

四庫全書

集部

欽定四庫全書

兩宋名賢小集卷一百三

宋 陳思 編

元 陳世隆 補

紫薇集

問晁伯宇

物生無榮賤悉是君所見相值有相違誰能滿吾願
田園棄荒蕪官居走郵傳誤尋文字盟秣馬當百戰一飯

金少臣八之二
卷一百三
或未飽逢人足嫌怨窮于投林猿窘若巢幕燕忍學少年子羽翼偷絢練百萬買纏頭千金奉娛宴願為匣中玉不作秋後扇丈夫重許與正爾未為倦絕糧有不死酒肉虛健美古人馬伏波吾猶識君面

讀秦碑

秦人跨九州欲以傳萬世立石名山傍往往示得意至今見遺刻字體甚雄異壯哉蒼蘚文未改回屈勢風雨所侵蝕中有千丈氣嚴如虬龍蟠深若鐵石利餘威到

山鬼謹守敢失墜漢魏能書人亦豈可睥睨未能識藩
籬何止趨姿媚初無一日雅但有三舍避文章又竒古
遷雄蓋苗裔觀其所著述肯為尊者諱巧言未大失末
乃為俗累嗚呼結繩前此又誰與記君臣共無為垂拱
天下治春秋紀日月大易垂彖繫羸氏厭休息動以衡
石計斯翁變古文程邈分篆隸自此更滋蔓日以趨簡
易馳驅千百年漫有紙筆費詎能罷煩文畫掃著天外
此書雖見存或以少為貴特此槁木枝我亦甚無愧

龔彥承觀軒

愛山不能掃常恐山怪責終歲在行役感動頭已白
高秋強僮僕路過龔掾宅蒙君開南軒除我限界窄白波
遶青嶂彷彿見顏色江上飛來峯卻立對君側蕭蕭蒲
葦叢不受塵土隔知君有竒趣笑我常偈仄人生無窮
已得一乃願百牀頭貯美酒窓下著好客請公但默然
歲晚當有獲

堤上

落花吹盡不堪憂只見河堤水漫流
晚日強穿城北市
春風猶駐驛南樓
妻孥獨覺為身累
歲月終難望汝流
萬里長江一樽酒
故人何處倚偏舟

京師新鄭與諸晁兄弟往還前後數詩

夜語不嫌久凜然天欲秋
客燈吹屢滅細雨落還休
未許金張並虛為
鄆杜遊江河
少歸夢知為故人留

我髮日已短
公愁安得長
塙根春薺老
瓶水臘梅香
侍立無天女
相隨有漫郎
平生湖海興
今夜宿連牀

髮短各已白眼昏誰復明殘春斷花柳晚日閉柴荆潦
倒書常廢驅馳夢或驚尚于團聚樂雖老未忘情

令弟窮顏蠟書生老仲舒相招得共處何往更安居歲
月塵埃外桑麻雨露餘送行無別物圯上一編書

苦語相留極虛床會宿頻山東今出相海內不無人婦
女能尊客兒童不厭貧長途有知遇今日倍情親

雁

雁從何方來云自燕趙北今當何所往暖日近陽谷寒

雲墮江漢未見所棲宿朝憂稻粱少暮畏羅網逐惜哉
還往頻愈覺歲月促悔不近藩籬隨羣逐雞鶩羽翰何
必好志願亦易足物生有高下終恐厭摧伏公看滄海
頭萬里飛鴻鵠

海陵夜作

夜長夜長天復霜海陵城中今夜長夜長夜長天向晚
海陵城中今夜短路長家遠來信稀水閣山深歸夢斷
堂上書生頭已白朔方健兒十年客想渠當此夜長時

撫劍雖長酒杯窄明妃愛惜漢宮衣烏孫公子終不歸
戚姬去視鴻鵠舉更為君王作楚舞當此夜長誰送迎
此月還如今夜明夜長夜短公莫厭寒即重裘熱須簟
夜長夜短公莫憂多憂多厭公白頭

洞庭

嘗聞洞庭湖秋至清皎潔往來八百里長風駕明月中
有仙人居容顏若冰雪我願從之遊問渠傳寶訣脫冠
養霞佩長與塵世別

寄晁以道

朝鮮陁山清莫宿
賴水綠往來百里間
得此意已足吾
人少如願夫子更絕俗
閉門觀易象未用傷局
促使我
三日留共此一室獨皎如
嶺頭月凜若霜後竹欲為斯
文壽以作學者福
洛陽佳少年撫事多慟哭
此其於聖
學何似狗尾續
寧知草玄翁萬事不掛目
深湛而雅澹
亦不在反覆
吾祖早聞道
晚與夫子熟相期
千載外未
得一世伏
深山竄鼪鼯
晚日度鴻鵠
誰能從公遊
歲月

如轉燭

近體詩二十韵寄秉之

憶昔春將莫分攜桂領邊落花依斷隴飛絮滿長川風
急吹殘雨雲開放晚天山光如欲動草木不勝妍沽酒
遙村市停驂近郭田臨行思欸曲已別更留連治邑煩
游及編民荷息肩高才久藏巧篤行衆推賢屢辱銀鉤
貺頻更玉律遷故鄉迷數澤回夢渺雲烟漂泊遙相望
窮愁祇自憐愛閒身益懶多病氣仍孱故國因人問新

年底事傳祇因升斗戀聊結簿書緣諸老方推轂乘時
好著鞭提撕起憔悴騰達動蜿蜒袖有平戎策囊無封
禪篇功名期萬里富貴屬丁年范蠡終興越田單卒破
燕異時歸捆載乞我買隣錢

田家樂

東家西家蠶上簇南村北村麥白熟小兒腰鑷日早歸
大兒去就田間宿斗酒相邀不為薄隣翁相對且斟酌
聖主當陽億萬年年歲歲田家樂

長葛道中遇周原仲

羸馬衝寒驕不駛積雪殘冰雜泥滓長葛縣中日落時
舉頭忽見周夫子下馬相看兩驚怪各喜南歸此身在
僧房夜語久不眠更摩枵腹償詩債子行四方尚謀食
我亦年來倦行役樵下驂留世得知海底珊瑚人未識
長安公卿富貴客誰能日在子思側洛陽少年未宜輕
看子重陳治安策

贈益謙兄弟

范郎走微官清固不絕俗家常四壁立腹有萬卷讀
邇來所為文深若泉萬斛紆餘風過水宛轉蟲注木諸弟
况可人不但好眉目丹穴固出鳳藍田自宜玉行扛九
鼎重頓使一世伏聖朝急用士如子尚窮獨乃知德在
躬不必富潤屋我病拙文辭筆鈍如髮禿時逢子兄弟
未語心已足長空絕纖埃何處著鳧鷖朝來秋氣清佇
看飛鴻鵠

寄宣城故舊

宣城經歲無他事尚喜交遊不棄遺
臺嶂樓頭納涼處
宛陵堂下探梅時君今尚要一囊粟
我去亦無三徑資
掃卧雲山更深處因書頻報故人知

浮梁道中見小松數寸者極多然皆與蓬蒿雜出
不能即長也余傷之作詩寄范四弟

青松數寸根意出千丈外如何蓬蒿底此志久未遂
朝為牛羊踐莫受塵土翳雖云歲寒姿當此亦憔悴
今年雖小出尚與凡草類會須扶其根與作棟梁計
大厦千

萬間匠石所睥睨世或未盡知慎毋傷汝志

題筠州僧房

客來無語坐禪房共賞西窓一榻涼山路雨餘新筍出
江城春色雜花香烟厨已逐鐘聲遠樹色初隨塔影長
敢道閒居便安隱今年更欲下湖湘

嶺外懷宣城舊遊

中原未敢說歸期却憶宣城近別離疊嶂雨來如畫裡
敬亭秋入勝花時每憎卑濕尤多病苦愛風光屢有詩

今日衰頹那可說鬢鬚經瘴總成絲

山居素飯

豆苗可淪匏可羹僧厨午飯煮香粳道人得此清淨供
下箸已勝肥羊烹平生為腹不為目偶逢一飽心自足
晚菘早韭舊所知五鼎百牢未為福

寺居即事二首

瘴癘過庾伏庶幾其少瘳甘心忍殘暑指日是清秋汗
水他年別郴江此日留如何理歸夢只見嶺南州

因循過嶺表忽復到湖南氣力渾非舊情懷老不堪無
錢供痛飲因病廢清談尚有尋書僻窮搜未免貪

賀州聞席大光陳去非諸公將至作詩迎之

五年避地走窮荒嶺海江湖半是鄉歡喜聞君俱趣召
衰頽如我合深藏曉寒已靜千山瘴宿霧先吞萬瓦霜
日日江頭望行李幾回驅馬度浮梁

次韻王漕見贈并寄曹吉父二首

前賢去則遠今代不無人小出已無敵深藏恐未仁兩

章知思苦一語見情親徑欲忘衰病如公筆有神

曹子往南國端居無所思逃禪不用酒投筆漫成詩敏
捷忘千慮縱橫又一奇於中有佳處莫待折肱醫

次韵折仲古見贈

未有絲毫補縣官幾年流轉但求安江湖自稱嵇康老
故舊空嗟范叔寒顧我初無食肉相喜公復著侍臣冠
新詩不忘東山志敢作尋常禁近看

永州西亭

舊聞西亭勝獨盛湘湖間山秀水亦好千里在憑欄今
來乃不然眼境故未寬環城但濁水滿目唯荒山如何
柳司馬肯為此解顏始知憂慮久方覺所遇安我從避
地來山水日飮觀初不厭嶺嶠况復嫌荆蠻徘徊念昔
人亦作故意看所慚二三子來不倦躋攀開軒納微涼
共享一日閒說詩到雅頌論文叅誥盤快若箭破的圓
于珠在盤此樂固可樂此盟安得寒天暑畏道路時危
多阻難相逢得少欵莫問何時還何須待杯酒始盡平

生歡

贈珪公杲公四首

北歸住江西塵事日窘東兩公時踵門高誼已絕俗空
房擁殘火更許相就宿不厭寒無氈肯厭飯脫粟

杲公玉壺冰所至自清淨珪公出林鶴肯與雞鶩競吾
窮得兩公頗覺意氣盛未能出艱危猶足起衰病

杲固昔所熟珪亦舊聞名江西一聚首遂寬南去程掃
除文字習追尋香火盟期君向此道隱若一長城

堂頭老居士我識蓋自早聲名從少年閉戶今却掃公
能為少留尚可慰枯槁欲知主人賢但看此二老

和邢子堅韻

萬里仍歸舊秃翁笑談聊復與君同
鷓鴣所願一枝足
鼯鼠真成五技窮短髮自梳渾欲白
殘爐因客尚能紅
正須混迹師元亮未忍低頭學敬通

戲呈東林雲間二老

幾年湖嶺費追尋尚喜歸來聽足音
禦虎已知我有命

問禪方見子無心風塵黥懜病如昨歲月崢嶸窮至今
猶覺相逢有餘恨老盆盛酒不同斟

余常謂可與共飲者至難得也二公

超然之韵可與共飲也而不得共飲為可痛惜曉此語者許伊具一隻眼

荅錢遜叔訪戴圖

北風吹霜夜如雪江城草木凍欲折病夫袖手無所為
一坐臨川已三月忽蒙妙句起衰憊頓覺和氣生毛髮
公能忘機我亦倦不待曼殊見摩詰畫圖是非久未解
况保長年不磨滅請公置畫莫多求要與時人除愛渴

與錢遜叔飲酒分韻得鳥字

客遊等浮萍歲事如過鳥逢公得一笑不厭古寺悄雨
聲喧客耳燭影吹半裊宿醒未及解更覺惡韻擾時方
足艱虞身未識要妙如何一杯酒便作萬物表別公願
一言使我意易了

贈別范一哥

相送不嫌遠詰朝當語離文詞知子進道路覺吾衰力
疾終無補徐行敢厭遲臨分更回首苦語漫成詩

與范益謙炳文叔儀步月

歲月忽已過羈窮非獨今
稻塍分白水月影上清陰
畝平生事江湖他日心相過
無百步猶覺費追尋

竹夫人

與君宿昔尚同牀正坐西風
一夜涼便學短檠牆角棄
不如團扇篋中藏人情易變
乃如此世事多虞只自傷
却笑班姬與陳后一生辛苦
望專房

寄題暨尚卿雙蓮亭

異畝同穎久未出雙脩共抵復何物令君何以得此花
和氣所致無他術雙蓮共蒂中連理相映同心出秋水
秋水池塘曉自涼雙蓮中含風露香飛燕姊妹不相妬
並騁逸艷來昭陽自然容質見高韻不必粉黛呈新粧
君家孝友聞郡縣故使竒祥眼中見一洗東南戰鬥塵
小人知之亦革面我來崎嶇山嶺間忽聞雙蓮能解顏
請君更畫作圖看毋使惡木譏雕殘

寄范四弟十弟

俗事紛紛如亂麻又扶衰病轉天涯文章老矣思吾弟
頭角嶄然勝外家異味幾回占食指遠書終夕望燈花
何時更住城南寺共聽春池兩部蛙

游鳳池

遠近諸山翠作堆鳳池北望更崔嵬青松夾路攬天去
白鳥翻雲傍海來喜有故人同出郭屬因衰病阻銜杯
猶憐不赴對牀約獨上籃輿日暮回

送筓與何晉之

年來念念欲深藏頗覺看書氣味長
莫怪囊空無一物猶能分笋送何郎

送林之奇少穎秀才往行朝

我為福堂游破屋占城市城中幾萬戶
所識一林子翦然衆木中見此真杞梓
未為棟梁具且映風日美子之於為學
其志蓋未已上欲窮經書下者百代史
發而為文詞一一當俊偉夫豈效鄙夫
念彼不念此今來赴行朝學已優則仕
窮通決有命所願求諸已聖賢有明訓

不在拾青紫丈夫出事君邪正從此始

次韵李伯紀園亭

昔日翱翔雨露邊已將勲業畫凌烟便尋松菊同元亮
不訪丹砂學稚川可但海山勝綠野頗知風物似平泉
小園只在虛窓外佳處常當几杖前

本無俗事可裝懷藥圃花欄應手栽乘興聊陪野僧坐
賞心時許故人來頓令此地成三絕不為他鄉賦七哀
鐘鼎山林兩無碍豫章須是棟梁材

鄭昂用岑參太白胡僧歌韻作楞伽室老人歌寄
杲老

楞伽室中絕皂白去天何止三百尺只今更住最高峯
齋無木魚粥無鐘已將虎兕等螻蟻更許蝶蚓同蛟龍
聞道說禪通一線為爾不識楞伽面一生強項我所知
氣壓霜皮四十圍世人未辯此真偽敢向楞伽論是非諸
公固是舊所適鄭髯從之新有得欲將此意向楞伽但
道鵠烏同一色

金史卷之三
卷一百三
贈王周士諸公

空房夜氣清，落月傍簷明。
念我平生友，相望隔荒城。
吾老未厭書，破窓猶短檠。
君亦不得閒，默坐數殘更。
共結香火社，同尋文字盟。
王子潮州來，一笑冠歌傾。
千飯展僧鉢，村醪傾客瓶。
相逢但談道，絕口不論兵。
未免俗眼咲，屢遭時輩輕。
人生各有趣，小大俱有程。
譬彼澗底松，難伴池中萍。
雲鵬與斥鷃，已矣兩忘情。
一洗瘴海耳，此言君可聽。

會稽石道叟教授南劍兵火搶攘之餘興治郡學
尺椽片瓦皆其所自經營也未期月而學成遠近
賴之又祠前輩賢者以風勵多士使遊其間者望
之而心化由是而入堯舜之道不難也古之教者
蓋多術矣五帝憲三王有乞言憲賢于乞言也道
叟知之矣呂本中為作詩叙本末云

聖賢道則遠世久學欲絕區區續微言未易勝邪說石
侯東南秀睹此心欲折分教南劍州意在補忘缺歛令

兵火徒復見，俎豆設廟貌，甚尊嚴。上下有區別，先生默
無語。風化動閩粵，斯文自明白。如仰見日月，坐令穿鑿
誤。不待湯沃雪，不知旁祠誰。今代古豪傑，孰能與之齊。
共此歲寒節，入門日在望。未返意已竭，由來正心術。不
在費頰舌，乃知勲陶功。自與聞見別，參魯回不愚。亦豈
有優劣，此理尚可求。萬古同一轍。前輩謂陳了翁也

寄內弟并示仲輔諸公

江浙音書絕，不聞每逢時。節嘆離羣一，秋多病常嫌。客

短日無聊只閉門，淺學未容窺易象。
舊書聊復誦玄文，莫言耆舊彫零盡。
海內交遊尚數君。

離洪州渡西江至翠微寺紫清宮

平明渡西江西山，正崔嵬中流欲浪作。
細雨隨風回促，櫂赴前浦頗為風雨催。
寒沙引細路，人家山半隈。密雨
蔭修竹，久旱無莓苔。曉入翠微寺，
諸峯環抱來。其西洪崖居，百代所
仰懷。何年蛟龍怒，更擊深山開。
懸瀑瀉洪井，噴噫藏風雷。客行少
休息，暫此得徘徊。城中二三老

咫尺不得陪豈無凌風翰邀致山中台澗水清且寒可
以當餘杯獨來不敢久恐為神物猜

贈歐陽處士

愛君年少便知足今君雖老更無欲閉門不出動經時
保此無窮清淨福黃衣弟子雜僧徒共住荒郊數椽屋
門前山水各有態君但踈籬對修竹直如季路耻有聞
清似子推不言祿坐看世事雲變化一任兒曹手反覆
上皇龍飛三十春臨軒亦嘗思異人詔書屢下廣搜索

當時幾人能識真君今聲名動天子高卧不起空逡巡
漫收符籙養丹火一旦四海生風塵我來見君斛嶺下
識君無營真靜者殷勤愛我莫遽行尚肯相從結茅舍
時當喪亂足淹留豺狼恣橫空山夜他年有意過匡廬
更許淵明結蓮社

次韵錢遜叔畫圖

西風著人塵滿襟江山縱近難追尋當年寫此數幅妙
坐使几案頻登臨斷雲黯慘出古寺遠岼杳靄連荒岑

漁舟蕩漾江路晚烟雲濃籠山店陰已知落筆氣象古
一任世間消息沈最憐霜幹倚長石不待歲久成枯林
知公此中興不淺此畫故能留意深只今燕坐一室裡
尚費從來長短吟詩成掩卷坐秋晚一唱三歎無遺音

次韵李仲輔僉判

曉晴破雨却寒天海上風光絕可憐更欲陪公了春事
不須乘醉始逃禪

贈范信中

異時攜客醉公家蠟燭堆盤酒過花
萬里溪山隔春事
十年風景困塵沙鄭莊好客澤如昨
何遜能詩老更佳
但得尊前添一笑莫言漂泊在天涯

病中

貸米供晨炊尚欠數束薪平生甘此味
此去未為貧
新霜已嚴厲況我病經旬但守是心足
無為思古人

寄閩中親舊

濃陰蔽列日小院有餘涼
頓覺枕簟好時聞荷芰香
秋

成今可必衰疾未相妨徑欲闔中去尋僧不裹糧

水仙

澹綠衣裳白玉膚近人香欲透衣襦不嫌破屋颼颼甚
肯與寒梅作伴無

破臘迎春開未遲十分香是苦寒時山瓶尚空無佳對
更乞江梅三四枝

梅花

野水依城竹映沙江梅開處又人家天晴徑欲花前醉

只恐衰顏不稱花

贈莊季裕

老矣莊夫子居閒肯厭貧
盛時更讀易憂道不無人
記往詩猶在相逢意倍親
尚期香火社文字約遺民

九日贈曾弘甫

荼花過雨十分香山後
山前已帶霜何事東籬數
株菊已將青蕊趣重陽

寄劉彥冲兼寄胡原仲劉致中

故人別去兩經冬
今歲書來第幾封
正以空疎小製作
不因窮約費過從
養生漫說終難效
學道無心亦未逢
若問真歸是何處
五更常聽寺樓鐘

古意

茂陵消渴遠山眉
那得閒情到綠絲
一曲白頭吟未了
迴文字字起新詩

兩宋名賢小集卷一百三

欽定四庫全書

兩宋名賢小集卷一百四

宋 陳思 編

元 陳世隆 補

紫薇集

簡范信中

詩人例窮君不然畫堂繡戶羅嬋娟當時乘醉出三峽
至今妙句留西川底事新來多退縮梅花滿眼看未熟

便期載酒約來冬似要惡詩相抵觸曉來寒凜似中原
君忍閉門清晝眠我病猶能相追逐知君心期總不俗
但攜二妙喚諸公一醉落花吾亦足

再簡范信中益謙呈張仲宗

昨日之游樂不樂主人愛客客不惡梅花遠近遍川谷
雨凍風揉未全落明日之游復何如城南城北梅更多
對酒我不飲把盞君當歌酒肉雖勤主人費且幸我黨
頻相過梅花縱落君莫歎與君同往海南岼花開花落

都幾時君醉我醒人得知相逢一咲俱有詩如何不飲
令君嗤

連得夏三十一翼兄弟范十五仲容趙十七穎達
書相與甚勤作詩寄之

閒居病亦侵世務每絕念猶憐二三子從我久未厭書
來不改昨意苦辭亦贍問我來何時期我早會面我行
但謀食欲去復未便要當相就居同止山水縣讀我所
傳書亦足滿素願開卷忽有得如飲醇酒釀吾聞古志

士學也蓋有慚欲升夫子堂不摘屈宋艷倒籬望青天
豈必在窺覘他時倘從容此語子可驗

送錢子虛撫幹役洪州赴新任二首

君不求時用居然如病夫經過閱歲月相伴走江湖白
玉終無玷寒松保不枯同官多勝士總為致區區

老矣吾無用歸歟子未宜端能出奇策略為濟斯時悶
有書撫眼閒須笏拄頤西山有爽氣當報故人知

問乾元珪老

問訊乾元老江頭幾日回
還應艤船待不作御風來
漫有經旬別頻思一咲開
庭前荔子熟尚要著詩催

謝宇文漳州送茶

暑氣侵人病逾劇空堂坐調出入息
漳州太守送茶來
玉圭小鳳俱無敵太守憐我病無語
故遣此茶相勞苦
千金一瓶君未許
百金一盞如潑乳
其他鬪芽未足數
下視紛紛等塵土
病夫未飲病先愈
坐覺真氣生肺腑
城中車馬鬧如雨
更有藥善如君否

謝楊紹祖惠玉友

我來閩中居中熱久斷酒端居苦無事神氣思內守故人憐我病小缸送玉友極知此不凡嶺海見未有感君意則重納約况自牖欣然洗盞嘗不待捧素手空杯貯玉色一洗市沽醜坐令百疾去敢復望升斗從今破酒戒可以入道不

聽雨

日數歸期似有期故園無語說相思芭蕉葉上三更雨

正是愁人睡覺時

末利

香如含笑全然勝
韵比醑醑似更高
所恨海濱出太遠
初無名字入風騷

夜涼早起尋李貽季陸慶長所惠詩有作

夜長忌陰晴忽聽簷雨寂
空房閉重門涼氣通枕席
欣然欲攬被如覓舊相識
那知庚伏內得此睡通夕
起尋兩君詩令我生氣力
成溪長桃李已自除荆棘
遠遊得

數士舍此百無益挑燈視皮膚不願蚊齧亦因之不復
寐為子增歎息

聞大倫與三曾三范聚學并寄夏二十一四首

我思臨川居欲往意未慊每懷三千子歲月多在苒後
生慎所習正是絲在染未須極軒昂且須就收斂舉動
思古人此志豈不遠才雖有高下事亦要強勉願為江
海深莫作益益淺

世人爭錙銖未語色已變居然面頰赤自處亦已賤寧

知烈士胸渠自有志願一介不妄取萬鍾我亦倦古人
有伯夷名冠太史傳

見人輒有求所以百慮非但能守簞瓢何事不可為愚
夫飽欲死志士固長飢出門萬里塗其亦慎所之
莫惜一日勤而忘終身憂農夫力耕作其必歲有秋目
前不鹵莽久亦有倍收小年不努力長大復何求

別林氏兄弟

二年住閩嶺所閱足青紫那知萬衆中得此數君子相

從不我厭但覺歲月駛高論脫時俗如風濯煩暑出處
雖未同氣味固相似人生有低昂所畏為物使要當啜
英華不必計渣滓他年肯相尋在彼不在此

將去福州

委曲隨人久未甘倏然午枕睡方酣功名到此終無分
身世從來百不堪為已功夫今粗曉住山活計久相諳
他時不用求三徑投老才須住一菴

初秋

涼風驚木葉意欲作深秋客病渾如昨囊空却自由因
閒得飲酒端坐勝封侯寄語平生友當能為我謀

嚴州九日坐上贈胡明仲常子正

今年得交舊九日會嚴州城角風雲暮天涯景色秋功
名有長鋏行李付扁舟苦恨三年別聊因一咲留病添
文字懶老耻稻粱謀活世須公等吾生便可休

贈了老

前年見公滄海上法令堂堂萬騎將今年見公浙河東

猶是當時舊老翁送行更有天童老騏驎齊驅獵霜草
野狐射牛膽欲破不但獨噴羣鳥倒我衰且病百念絕
便得從公不為早忘情遁跡亦未是言與不言俱一掃
世人擾擾不歸家公行問渠有何好

將發金陵奉懷張彥實

老矣君何往翩然我欲歸文章晚未用歲月事多違江
接鄱陽路風吹游子衣不應遽伯玉獨悟昔年非

孫首之短堂

孫郎囊空意且滿自謂身長才則短以短名堂堂未成
長短是非俱不管嚴州一見鬚蒼浪贈我新詩如夜光
何時到君短堂上更話如今歸興長

朱成伯秀野堂

客愁固多岐我懷亦蕭散連年尋故人見子二水岍官
居少閒暇歲月忽已換有堂名秀野未入俗眼看得名
自君子可當清淨觀未能熟桃李且自飽藜苳荒涼城
一隅初不越門限脫身少年場念此已熟爛嗟予老病

侵閱世蓋多難相逢默無語自足洗憂患窮冬足雨雪
近市乏薪炭時來正堂堂尚得一笑粲

次秀亭韻

舟車來往闕回環今日陪公得暫閒漸喜著身人迹外
勝如隨衆馬蹄間縈紆細數溪頭路蒼翠遙看雨後山
正恐朝廷須舊物不容常此面孱顏

舟行至桐廬

乘舟待潮發一日到桐廬物色寒初甚溪山畫不如往

來真是夢親舊不須書猶騰鴟夷在時容託後車

示兒

忍窮吾有味雕句汝無功客舍蠶塵裡春隨浩蕩中初
無買山費直與住菴同更想顏回宅簞瓢亦屢空

嚴州春曉

居閒病常嬰出郭春已老微雨淨新綠轉覺原野好故
人各漂散頗恨來不早尚有壁間詩猶堪寫懷抱

將適三衢而七弟欲往臨安臨行作詩奉送

弟要題詩別人還勸我留如何南去路更送北行舟處
事須遠略擇交當廣求秋風理歸棹為我上衢州

擬古樂府

高堂陳八音同聽不同樂狂飈送鴻鵠萬里翔寥廓一
去三十年事事非前約當時綠綺琴塵埃無處著時節
非不久此意但如昨

將往城南觀音寺阻雨未果

野寺他年別溪山浪作秋初涼頗宜出小雨故妨游僧

老渾無念田荒近不收猶思五更懺清切似蠻謳

求趙表之墨

超然堂中墨如戟支撐宗門渠有力參得諸方一味禪
以此示人人不識病夫見之喜折屐便欲投詩恐無益
主人不吝是家風會見琅琅送珪璧

陋巷

陋巷客自稀短日寒未到感君時一來得以慰懷抱論
文有根柢落筆清且奧如歌五絃琴促軫有餘操黃花

開正繁薄酒可相勞請君尋此盟妙處同一造

聞蔡九弟十四弟到行在

苦懷我表弟別久費相思愛客能忘酒長貧不廢詩每
蒙高士喜終少貴人知試問游吳興何如在蜀時

窮腸有懷

冰霜到窮腸伏枕久亦倦思公如和風咫尺未得見人
生無賢愚各自有志願但得所趣同公固不我賤何須
肱九折始見金百鍊平安望中原棲息各異縣尚欲從

公遊衰年保窮健

贈人

堅卧因循欲過冬，故人無復馬牛風。
得君好句能忘病，笑我長饑不諱窮。
清夢肯嫌齋舍冷，破囊常伴酒杯空。
新正所願長窮健，刺作歌詩準備公。

夜坐

所至留連不計程，兩年堅卧厭南征。
荒城日短溪山靜，野寺人稀鶴鶴鳴。
藥裏向人閒自好，文書到眼病猶明。

較量定力差精進夜夜蒲團坐五更

簡李巽伯

愛酒舊無敵能詩新有聲
荒城時過我長句屢尋盟
往事十年夢生涯三尺檠
却憐陶靖節著意賦閒情

官閒贈人

自喜閒官不計年月叨微俸
勝歸田藥囊往往充詩藁
米券時時當酒錢忍病作勞
吾不厭對人無語子差賢
不須更見盧溪老會得安心
即是禪

病中得舍弟信

頻通婺女訊兼得會稽書歲月呻吟裡文章因睡餘百
年判憔悴萬里付迂疎尚欲身強健相從得定居

寄米希真

幕下諸侯老微言衆不聽祇應有餘論時復注前經郡
古疎還遠官閒任醉醒主人鷺可換更為寫黃庭

山城雨

山城雨雪繁春氣來不早思君如和風未見意已好時

蒙枉車騎笑語得傾倒我能知子賢子亦憐我老舊友
半鬼錄在者跡已掃慨然念平生令人惡懷抱相從飽
吃飯此計或未保東游有前約預恐別草草豈無一言
贈妙句寫默藁出戶仰高山猶堪慰枯槁

即事

經旬困炮煮今夕有微風市井囂塵外溪山嘯傲中秋
涼亦不遠吾道恐終窮準擬閩中士今年一笑同

宿昔

宿昔尚煩暑平生悲遠遊長貧不貰酒雖健嬾登樓晚
節勞千慮經年走數州新涼事事好只是迫防秋

謝人送詩

堅坐少愉樂欲行還滯淫時蒙七字句可慰十年心歲
晚日晷短天寒霜雪侵主人不厭客敢避酒盃深

寄京口使君

使君鎮京口隱若一長城詩律有同社溪山聊主盟
塵不掛念鷗鳥自忘情曾記貧交否衰頽判此生

再贈

嫠女勝京口公來歲已秋閒雲出山寺好月掛星樓往
事付清話故人多倦游十年浪奔走今日為公留

贈友

子來已冬深僅得數夕欵寒窓聽談道未厭白日短從
來不飲酒萬事付茗盃別去今幾日荒堦月猶滿

游山

世味日可厭茲游那得忘稻田疏宿雨木葉犯新霜潦

倒交遊在追隨氣味長僧窓有靜供茗盃
爐香

江梅

江梅消息未真傳微露芳心几杖前不信冰霜能作惡
要令桃李便爭先斜枝似帶千峯雪冷艷偷回二月天
準擬從君出城去竹輿仍勝百花韉

夜深歸家聞隣家小兒讀書可喜有作

還家更寒三鼓餘鄰家小兒猶讀書王侯將相乃無種
紈袴綺繡寧似渠北風颼颼霜被草聽汝讀書聲轉好

莫言翁媪惜膏油有見如此可無憂

雪

窮巷無人對雪小詩自可逃禪看取一年三白喜歡共
入新年

堅坐正宜養病開門便當幽尋一夜雪深一尺與誰取
酒同斟

報渾菴

春草仰生活春暉常照臨不知欲報德何以見此心江

漢有時竭此心無淺深魏氏有令德傳家非獨今結菴
在山阿日瞻松柏林仁風被遠邇猛獸不敢侵今子守
直道意往無崎嶇遂令此鄉人得聞金玉音我行時序
晚回望西山岑延頸長太息聊為純孝吟

雪夜

破屋除燈雪自明案頭無用讀書檠老慵已慣跣趺坐
昏夢尤便松竹吟知有故人來問道久無佳興與尋盟
明年更有閩山興但辨行纏莫計程

周仲固尚論齋

周侯不出何所為閉門讀書心自知
簞瓢陋巷君不厭讀書萬卷能忘飢
上叅羲皇下秦漢采取英華饑脫腕
是非榮辱姑置之忽若乘船到彼岸
古人之學有傳授君生寂寞千載後
問君何以識古人袖手無言坐清晝
以此讀書為尚友是事渺茫人信否
人信不信君不問松柏固難生培塿
朝來落葉滿荒城青山照人溪水橫
往來車馬作塵土想君深夜讀書聲

重陽前一日作

涼風策策傍江城道路猶寬遠去程秋晚情懷常索莫
夜長更漏轉分明未償臍腹三年艾不負膏油二尺檠
明日黃花一尊酒苦思親舊與同傾

送曾弘甫知黃州

才過清明日更長竹輿頻出度浮梁雨侵田水連溪白
春入山花帶密香數有故人相勞苦不嫌俗事且窮忙
今年尚有湖湘興不待秋風便促裝

謙上人清湍亭

道人結菴殊未就先起小亭山左右不將溪水濯塵埃
且以清湍為客壽雲烟映靄作春濃草木堅枯辨秋瘦
客來相對兩無語豈有浮辭問時候一生行脚如夢覺
天意似於君獨厚我今留滯未得往想像此亭如故舊
再三伸紙誦清詩已勝開尊飲醇酎

上人錄寄彥禮彥
冲原仲諸公題詩

簞瓢可樂不淡泊蘭菊重生足滋茂他時有暇更分題
此遊未落諸公後

送詹慥秀才

子今來幾時歲月忽已晚今當別我去道里初不遠家
山霜正濃馬草寒更短何以奉親懽一笑和氣滿邇來
遊學士已見如子罕讀書要躬行俗事不厭簡故鄉多
者儒歸日正可款時能寄餘論尚足起我懶兩州多便
人自可數往反

靜軒

紛紛逐人行擾擾與事競不知一世間能得幾人靜公

今默無語種種以靜勝人來漫相接事至聊復應開軒
道院旁足以補我病日高公事散轉與靜相稱千載師
蓋公此理久已證爐烟裊暗窓松聲韻鐘磬簿書勿勤
來公方在禪定

秋牕遣興十首

造物何繁敷雜然呈萬變潛飛愜會心顯藏亦遞見人
生事機巧雕鑿失性善碌碌塵寰事輪環走精雷蕭散
眇庭柯商意集微霰

晴枝颭小鳥啁啾振毛羽涼颭墮寒花靜中有真趣倚
檻看浮雲隨時成散聚世變無常境心定自安遇槩几
雜圖書幽事能畢具

朝擁羣書坐所樂常自足聖賢重出處理本無偏曲志
行道合尊安貧未為辱壓架富卷帙縱情無踳跼窮達
各有時此意當勉勗

東園有喬木翳翳凌霄漢歲月變虬枝雨露滋霜幹濃
陰蔭書屋伴我同昏旦根株視百草秋風已萎爛良材

際時用未忍付樵爨

抱璞淪巖阿失懷亦自寶豈無用世心遇合貴得道連
城重白珩聲價先傾倒瑕瑜混沙礫莫訝荆山老會當
遊勲華元圭贊熙皞

旦奭久不作依然三代民一善孚萬端不難風俗淳上
士貴抱負修已在立身進退各有據宇宙任屈伸願言
勵厥修學以荅君親

門外一渠水清清自泠泠濯纓偕素侶鬚髮無遁形春

風起層波鷗化失南溟穀紋亂星斗泥沙混窅冥澄清
當有志天地還虛靈

知者尚明察不為物理宥吾儒任學術精力事研究至
人邈難繼得亦瞠乎後庸盲終溟溟全天亦自厚大化
無殊途何事朴與秀

寒氣生戶牖草木變輕黃南郊詢秋畦豐稔薦滌場八
口娛妻孥溫飽樂歲康簞瓢亦自得憂樂各相忘所以
常忻忻安問無儲糧

我生事桑翰中懷異好尚瀟洒逼嵇阮功成薄瑜亮白
衣本山人置身豈疎放途逢醉尉呵未具封侯相亭亭
千仞松當破萬里浪

次韵錢遜叔泛舟虹橋

半篙春漲綠平溪二月江城草色齊舟比蜉蝣千頃外
身同鴉鷁一枝栖野橋柳綫斜風軟曲檻花光夕照低
却訝探驪人不至清樽盡舫倩分題

春暮渡江

霽色春江上滄茫一棹通水隨天地濶山入畫圖工薄
靄凝新碧輕風墮亂紅片帆迎返照疊嶂路疑窮

渡鴛湖至溪上即事

宿霧重陰傍晚桴日斜風定渡鴛湖陂塘浩淼水光濶
烟寺中流島嶼孤滿眼波濤迷客泛一行雁影帶雲徂
到來荒舍未岑寂寒樹依依鬧晚烏

絡繹蕭蕭徧里門支機嘉事自天孫七襄曉織憐花譜
百室春梭饜夕飡誰檢吳闕歲月猶飛楚穀照軍屯搯

揆女手還持作佳麗江南第一論

湖水安瀾似鏡明昔年曾向鏡中行侵晨浥露來花市
落日流風倚醉楹俯仰繁華餘暮色蕭條高寄但秋聲
應知節序猶遷轉撫劍如何教未平

紀棲賢山讀書

遲日欣欣山景妍攜琴吟咏翠微前行厨燒筍粉鋪色
高閣看梅雪白天午罷拋書曳短杖雨來擁卷聽幽泉
一春洒落韶光足他日芳懷得復然

秋日康山東歸

整檝凌晨問所之鄉園迢遞水東遲歸舟但信溪紅蓼
別夢還牽山翠眉安穩秋風三徑竹躊躇行李一囊詩
解維猶有留題處瓜葛縈懷不自持

中秋

雨雲初霽放晴空乍捲珠簾望月宮夜靜笙簧何處發
玉樓猶記月明中

泱泱秋水荻蘆輕徙倚樓頭待月明紅燭燒殘白墮醒

秋風颯颯獨關情

長嘯夜泊

春烟失晚樹桑櫓翠峰眉
楚徑尋山暗艤舟問路岐
敲詩吟入甕點字黑前池
把酒懷前哲蕭條一夕思

月夜閒步聞笛


挑燈讀易後乘月到溪前
野犬聲如豹秋蟲吟似蟬
光寒人意靜影澹物情妍
更聞村笛遠幽意曲中傳

遊石筍菴

石筍殊峰精舍幽瘦筇踏向碧雲遊天然青出層崖裡
玉版參來點石頭

夏夜宿乳竇峰

峭壁凌空靄氣浮山泉滴茗暗香流炎雲不到冰心靜
好句峰前一簞秋



兩宋名賢小集卷一百四

欽定四庫全書

集部

兩宋名賢小集卷一百

五至
十三

詳校官中書臣閔思毅

助教臣常循覆勘

總校官編修臣王燕緒

校對官編修臣何循

謄錄監生臣李連

欽定四庫全書

兩宋名賢小集卷一百五

宋 陳 思 編

元 陳世隆 補

演山集

黃裳字冕仲南平人為書生時常有魁天下志博學
宏詞尤邃禮經元豐五年廷試第一人政和間知福
州嘗為端明殿學士禮部侍郎遷尚書方三舍法行

裳謂宜近不宜遠宜少不宜老宜富不宜貧不如遵
祖宗科舉之制世以為確言建炎中年八十七卒所
著有演山集六十卷

送胡君遊洛

得喪紛紛轉羣慾誰及愛嵩三十六有客忽自東南來
已為湖山飽雙目逸興不住皇州春天津橋南初酒熟
長念花王司馬坂洛陽今寓誰家館已聞香信漏春風
嬪御相從水光畔芳容須向盛時吟昔也醉翁長恨晚

殺雨且老黃鶯聲急上征鞍望湮澗送行詩句無纖塵
自有交遊在霄漢藜莧腸中何所須但愧銀鈎落香翰

簡元興祠部

百花巖上仙人住巖下為州山水聚白頭青塚南北人
倒影沈沈獨懷古倚欄把酒與誰同況是使君為獻主
應喚漁舟疎葦中旋膾遊鱗落紅縷秘書座上最軒昂
能共春雲爭態度紅衣帶月今何處幾轉春殘掩朱戶
飛船送客空斷腸染塵漫落聲中句虛白亭前湖水間

忽為霓裳起思慕出門沙土亂如雨薰風吹夢天南去
簡元咎學士

北澶車馬來何暮芹苳池邊失歡聚有分共為文字遊
却向西郊話今古世俗聰明多澆漓信厚期君中有主
職事無塵靜相對滿榻詩書香數縷嚴扃如在陰柙中
綠幄朱簾細風度紫犀銛破雪花濃石鼎煎聲遠窓戶
淮擬七椀邀盧仝清滌煩襟出新句共笑先生最負苦
誤使簾前客相慕虛名薄利能幾多裹飯區區來復去

寄題妙光亭

天邊月下雲初盡
江上潮來風已定
雨初無情豈有期
但見圓光非遠近
潮回月落杏難尋
元無此景何須問
沙北渡頭人自忙
誰向山翁說真性
滌除塵垢無少休
他日危樓與君凭

假山

天作乃為真人功
故云假堆疊朶竒恠
含思亦如畫
遙岑出千碧
羣岫擁而亞
蒼苔把秀骨
猶愜時雨灑
去來

何所人度嶺策羸馬安得無心雲經從斷復挂日落行
且休寒巖峙孤告

送滿龍圖守奉化

臺省兩稱公郡國三換節海角承重寄螭頭懷遠別俯
仰七遷近覺夢一炊熟先生自怡怡浮世誰悵悵暴霖
駕西洛華爐指東浙香徑催芰荷豐厨拾魚鱉窺影入
賀湖訪古探禹穴未暇登四明方思白華潔親闡悵望
時千巖看堆雪

春霽

動潤畢化事清曠却陰翳披雲出寸碧銀色爛盈地芳
徑導衆榮頑凍展羣翠雨霽春且老良時固難計好景
歸新詩清樽接佳士韶光宜夕陽醉卧莫輕起

送林疑獨教授

猶憶龍津曾把手閒對雲山一樽酒譚高稍犯禪師強
遙指青尖露踈曠碧水起人新思濃旁釋竒文到科斗
自笑山翁緘默多來處長疑抱真叟乍喜相逢春色中

忽見天機動楊柳

覽武夷記

武夷山中十三子邂逅相逢良有以太清筵前何事醉
一時謫在人間世八百年後還升真武夷真君真主人
天台有籍安得知不謁子騫誰與祈紫雲中下龍潭雨
猶喜張仙好詩句

留題琴軒

軒閣競華麗誰肯歇絲管豪華既交歡盛麗亦同翫鳴

絃雖侑觴惟宜素纖按聲色方爭高耳目及中亂古意
始興懷曲終情已換黃子尋天真開軒名以琴問琴意
何在答以琴為心我願聽以目與子為知音無絃之琴
聲無聲世間此曲今何人

道倫竹閣

曾看孤山翠微麓回環閣下千莖竹醉吟先生唐室賢
灑落情懷出流俗赤城德士攀高風特借嘉名榜山腹
雪霜難犯中心虛直節凌雲聳蒼玉月華弄影無纖塵

合有丹霄鳳來宿

重九遣興

佳節歎短晷清爽愜幽抱
新故遽相代意思幸長好
百年如秋時行行越中道
重九雖百回半百已云老
雲淡傾新醅籬花摘靈草
但約金巵空何愁玉山倒
且趁馬臺道莫管龍山帽

燕子樓

盼盼初歸樓上時
相知燕子長雙飛
有才將色世間少

況復節義猶堪依將軍一去十餘載玉簫瑤瑟無心解
豈不能死空相隨以色累公非所知白老曾為賦詩客
風裊花枝醉無力後會勳郎漢陽驛因語歔歔已成昔
走筆還贖美人句猶感白楊堪作柱我來登賞非唐人
尚引多情聊愴神人生真書皆為塵百年一餉難留卷
高樓人散誰復親只有燕子年年新

中秋日賓興宴

九十秋分今夜景銀色界中秋意靜獻賢時入帝王州

鼓瑟筵開山水境西風勁衫袖冷遙度天香到酒邊中
有醉翁吹復醒徘徊態凌亂影怎須行樂慰勞生相得
相忘無食頃一年人受此回圓十分仙桂都開盡自有
清光隨我身嬉遊寶蠟何須秉

次常父著作作曝書之韻

內閣儒方集先朝事不忘曝書開綺席偃武斂牙璋
籟軸陳千古金珠萃一堂日華窺鳥迹水艷照金觴已掃
斷簡蠹更增東壁光士高間粹語天近覽幽香見博思

唐庫思新仰舜廊名山纔向曉振鷺已成行官職塵勞
少朋從語笑長但慙甘若醴寧恨冷如漿小說誅瀰漫
雄文薦焯煌培風誰有志從此好南翔

題桃花菊

水雲深處尋幽客競把銀瓶飛琥珀坐間玉篆流盃來
時伴桃花獻春色塵勞不到清樽前何幸山翁設歌席
人在夕陽方醉時回首雲迷武陵宅

送中吳太守

華省人間去領麾出關風景正相宜唐虞民物氣和日
吳楚江山秋靜時語接鄉音猶喜近舟行蓮渚莫嫌遲
古云廉吏君知否優孟空歌勸莫為

送袁志行戶曹

十年場屋費才華漫有詩名子可嗟未入儒林升俊造
且行春雨到夫家還乘澤國三秋月高跨天河八月槎
道阻且長瞻不及空吟霜露滿蒹葭

秋雨喜霽

陽光方接物陰藪已開闢
水落新痕定雲收去影間
菊花窺曉日松影撼秋山
滯思可乘興開尊為解顏

泛湖

放船初向白公樓渺渺天光簇簇洲
綠竹岸邊疑士隱紫煙沒遠恐仙遊
賓朋欲散還看月風俗雖忙尚買舟
最好四山環繞處一家中占五湖秋

初秋偶作

火行金候兩猶爭擾擾蚊蠅自未平
雲滿雨聲蒸地爽

日含山色暮天明直須紈扇思情斷始向籬花意態生
萬里壁寒無一點月明中看雁初橫

寄清退君章大夫

故人閒適地行仙林下邀誰共暮年把酒應思天際客
登樓俄上水南船懶看小吏呈朝報靜聽高僧說世緣
華髮未輸頭上白更期攜手斂溪邊

寄袁思與

京華為別各蹉跎猶幸相逢笑與歌風雅長言先進少

遊從高義故人多，雖知塵境先忘累。
猶念元宮未處和，行欲超然無一事。
便當求我何煙蘿。

觀蓮亭

青泥藏化香紅紛，看芬芳照水有餘態。
乘風無限香晚來，花氣盛暑後雨聲涼。
不著故不染，走盤珠自忘。

聞鴈

露下多時鴈未鳴，數聲雲外此霄征。
北人書到三秋盡，南國弓開一字橫。
孤館有誰驚好夢，平蘆何處起寒更。



想應俎上終須免宜向方塘寄此生

山堂有作

煙籠雲鎖幾千年流俗尋山豈得先一水中分吳越界
四峯前臥漢唐仙間遊東徑窺青海偶住西源翫白蓮
却看內遊還有感杖藜看指夕陽天

南樓有作呈仲矩舍人

莫言風物是窮邊塞北江南此果然蒼壁下粘芳草地
垂楊中臥碧塘天人吟夜月波中笛客醉秋荷雨後筵

來候朔音棲處好夢常捫斗過幽燕

除夜送代倪簽判

北風吹雪抹潮頭待過東南第一州去客情生來歲夢
隔江燈照此時愁玉皇謫吏行當復金闕除書即便收
言簡氣清終有用臥龍山下自難留

觀遊山記感舊寄霍子侔

故國別後有餘念舊記重看無限情山倚日中支暑氣
水從雲外落秋聲向前世務心猶壯憶昔溪居眼自明

攜手逸民今在否
杯茶誰與話平生

靈壁遊張學士園

休說行行且與吟
道山官職舊園林
石疑六醜默難問
竹類七賢間
可尋翠引賓朋三徑遠
寒生涯澗一池深
隋河堤上人空老
誰為蘭皋惜寸陰

秋日有感

清生明爽靜生悲
羣動相將却入機
物向本根成既老
鴈知時節去還歸
山人邀飲酒初熟
漁叟獻鮮鱸正肥

莫管世情多掃盡閒來林下看秋輝

社日遊雲門山

不須扶我自登山脚力能勝十八盤一字雁低頭上過
兩城人細掌中看雖知北戶緣猶在却笑南柯夢未關
忽見歸雲應是信滿襟先得洞天寒

次冷風閣之韻

能御冷風入九秋豈愁光景去難留翠搖竹影落猿嶠
清遞笛聲來鷺洲兩腋獨乘盧椀興滿襟誰作楚臺遊

須知大塊生微意，豈俟雲邊嘯虎丘。

次邦彥節推見寄

十年譏笑為誰妨，灑落思君酒甕旁。
曉殿雖爭多士捷，夜窓還對短檠光。
靜憐春草開三徑，冷怪朝齋引五漿。
且喜相逢頭尚黑，江湖休更起懷鄉。

和李學士試院感秋

荒庾初得雨，幽點失凋梧。
滯思舒千卷，高吟想五湖。
蛩聲生翠幄，酒力借微軀。
蘘跼貽文病，猶難望漢儒。

觀蠶

大巧不為蠶上簇機婦飛梭注雙目腹空萬緒徒自縈
縵素如山人未足

翠筠庵

外環碧玉千尋直中起真香一篆清宴坐主人俄出定
歲寒枝上得秋聲

次齊守巖去見示東湖之韻

共辭蘭省作諸侯更領東藩第一州公事了時尋好景

兩崗盤處得寒流

觀潮

十州基址難淪沒
二浙源流且溯洄
秋信最宜吳地看
雪峯飛向越溪來

秋日有感

秋來猶寄一涯天
葉葉秋聲似去年
可恨蕭晨長在客
不堪孤館更聞蟬

幾時能致買山錢
便好山中醉暮天
有物秋來長引夢

鱸魚新到曲江邊

延平閣閒望

倚闌誰問紫芝翁
湘浦幽懷莫我同
邂逅秦源人不識
扁舟常在水西東

舟行

兩岸青山一水明
溶溶天上客舟輕
行人千載誰相望
漫掃幽巖記姓名

立春奉祠太一

九霄香落降龍衣
隱隱霓旌下紫微
十雨九風春意好
已知消息曉來歸

桐廬縣仙人洞雜題

余得此洞十餘載
釋老之徒遊寓甚衆
多苦寂寞而去
崇寧己酉天台惠文來卜以居桐廬人相詒以資之洞于是乎興
大觀己丑春余自洞霄南還道出密巖之下
文請為洞中遊
因與余言頃有卜者為文占云
當有顯官至此度兩弟子由此遂為名利
今已度

弟子公復來乃其兆乎余與文言頃有異人道余自
紫元洞遊人間世子橋之西為余作紫元庵他日子
此棲養以度生文喜不日而庵成來求余文余嘗顧
洞中物皆出天造非人力所能為若夫池以時而盈
虛鳥以時而去來蟾以時而鳴默出洞之龍坐禪之
僧應擊之鼓跨空之橋與物合真與天同信皆非人
力之所能為者有待乎人而後見于世乃叙卜者之
占異人之語作詩絕以貽惠文大觀庚寅正月望日

紫元翁記

石龍

去臥仙源懶未安未收鱗鬣半身寒何如却起雷雲會
休作遊人一笑看

石橋

跨越虛中亦自然幾千年度地行仙桃花流水春風好
由此東西是洞天

青栗

枝葉凌雲綠蓋寒亂藤因得到雲端仙家手植無人會
誰信靈根石上盤

泛舟錢塘西湖

望湖樓上與雲齊下視銀河一道低好是水邊歌舞後
綺羅人在畫欄西

俄起谷風斜撼竹驟來時雨碎敲篷回頭已見煙雲合
點簡天邊失數峯

次致政李大夫郊步之韻

垂髫孫子侍閒行只在閒中度此生偏是杜鵑能愜意
不如歸去兩三聲

自萬松嶺之龍山

駸駸車蓋與雲叅控景金漿尚未酣穿過竹林何處樂
龍山前有集虛庵

還鄉有感

竹馬兒童已失真且尋春色莫撩人谿山不似當時見
只為交遊半是塵

將遊苕溪先寄同志

長愛苕溪乍入秋，有時東去與君遊。
詩成酒盞遊何處，千里荷花一葉舟。

送周奉議赴吳江

一官方解浚橋南，欲試絃歌豈為貪。
便得洞庭山下去，公餘誰共擘霜柑。

暑中

幽懷無處對秋陰，數疊雲峰壓翠岑。
安得水邊開一閣，

蓮花風信滿衣襟

松軒對雨有感

田無數畝難回首
主少高風易折腰
古往人非秋自老
松軒吟對雨瀟瀟

湖上閒賦

誰家經管度前汀
宛似湘江昔有靈
一曲未終船已遠
白雲空點數峰青

徐通直守連州

一隅不見古揚州惟有平山尚自留且看江南山色好
莫緣花月起閒愁

春日有感

桃李嬌春總不知風情惟與道相宜堂前楊柳青絲軟
吟看無人獨自垂

題仁壽閣

百年塵外境萬慮靜中身終日無他事寒泉照隱人

榴花洞

蓮社是非外洞天景色中一枝樵客夢兩腋石門風鹿
徑蹤何在榴花信可通此緣當邂逅來接紫元翁

兩宋名賢小集卷一百五

欽定四庫全書

兩宋名賢小集卷一百六

宋 陳 思 編

元 陳世隆 補

友松閣遺稿

張商英字天覺號無盡居士蜀之新津人登進士第
為章惇所薦紹聖初累擢左司諫工部侍郎大觀中
歷尚書右僕射中書侍郎貶衡州復官卒贈少保諡

文忠曾入黨籍有無盡集

凌雲行

麻姑何代仙南城有遺壇雙練飛絕巘天風逼人寒枯
螺抱怪石幾見海水乾清都在何許烟霧不可干宮闕
鏤白玉輜輶駕朱鷺念非麓濁質可以超雲端冲虛盡
塵滓變化生羽翰悠悠戚施子汲汲營舖餐頽然碩且
大軀幹歷馬鞍奉養恐不至齒髮忽已殘呼吸一時絕
枯骸積巘岼勝行望碧落霄露零衣冠願聞道之妙不

用擲米丹人間寧足樂棄去夫何難

過梁口

迢迢一水遠千山桑柘陰陰聚落寬好事莫傳江上信
漁樵自不識衣冠

贈玉巖

四圍岩谷上通天岩底幽人抱腹眠不羨莊鷗搏九萬
肯隨齊客列三千養成白雪高歌調散盡黃金有簡編
野鹿今朝入城市為余有意下林泉

睢陽五老圖

德政調元向道閒天朝詔許實辭冠丹心耿耿懸象魏
青史昭昭照玉桓晚節友賢陽鳳暖老年憂世谷駒寒
太平猶自存龜鑑後進儀刑仰慕看

蔣坊寺賜老僧

九十光陰欠五年寒灰枯木老雲泉眼明尚可穿針鼻
齒硬猶能嚼石蓮疑是合知諸佛印果然別得一枝禪
不因看破真贓物安得囊中出小編

香林院

瑟瑟松上風冥冥竹間露窓虛簾色寒石側蒼苔古長
廊寂無人殿閣下鈴語此意兩蕭然徘徊不能去

金精山留題

秦亡項滅漢罷兵分王宗室皆連城西方女子不用事
張氏有婦懷金精吳山之下吳水曲石鼓峯巒翠相巖
山幽水邃閨閣嚴二八芳年貌如玉吳王聞知心欲狂
珠琲繒纒羅千箱若憑青翼致消息陳說富貴誇膏粱

玉人冷笑吾當許汝第為吾開洞府洞成賦詩悲下土
悲哉下土人皆苦飄飄仙袂凌上蒼天街昂畢騰輝光
使回千里澀進步目極五雲空斷腸吳王悵悵忽不樂
入顧後宮情索寞仙凡會合竟何年多謝君王鑿洞天

孤憤吟二首

平津諛武帝堯舜未為聰歸來東閣士稱頌此周公勢
利變人心上下交相蒙低顏望眉睫一喜生春風優游
卒茲歲安知朝野空

青青一本桑下可百天息泠泠一井泉上有千人汲千里以為郡百里以為邑生齒豈不繁教化繫爾力何事此窓人歎此徒勞職

挽老蘇先生

近來天下文章格盡是之人咳唾餘方喜丘園空總帳何期簫吹咽轎車一生自抱蕭張術萬古空傳揚孟書大志未酬身已沒為君雙淚濕衣裾

題關公像

月缺不改光，劍折不改銜。
月缺白易滿，劍折尚帶霜。
勢利尋常事，難屈志士腸。
男兒有死節，可殺不可量。

護國寺

薄宦區區可歎嗟，寂寥寒館過村家。
神錐豈向囊中出，寶劍聊憑醉後誇。
就祿勉持毛義檄，讀書空滿惠生車。
掩關不識青春好，一夜狂風已落花。

與劉跛子飲市橋

遷客湖湘召赴京，輪蹄迎迓一何榮。
爭如與子市橋飲。

且免人間寵辱驚

天覺召自荆湖邊劉跛子與客飲市橋聞車騎過甚
都起觀之跛子挽丞相衣使且共飲因作此詩

遊天平山

山在林縣
黃華谷南

洞天金闕天平爵層巒石崖寒玉削突兀雲生縹緲間
翳鬆樹大侵寥廓蒼鹿揆摧北斗魁耍猿弄損南辰角
碑文壓破石螯頭琅玕爛折玉兔脚背岩松柏碧森森
向日雜花紅灼灼遮礙林慮半壁天琢成雲漢千里壑

宮宰爐燒延壽香避秦採得長生藥風物依稀紫府宮
嵐光繚繞朱陵閣路轉樵人目下迷桃源仙子心無錯
千形萬狀天平山剖判玄黃天地作

題天平山撲豬嶺

玉皇不禁上天梯半築臨崖與斗齊昨日我因尋藥到
祇疑驚起日中雞

五臺山

五頂峩峩接太虛就中偏稱我師居毒龍池畔雲生早

猛獸宮前客過疎
冰雪滿山銀點綴
香花徧地錦舒鋪
展開坐具長三尺
方佔山河五百餘

見山亭

簾捲疎煙醉眼開
浮雲飛盡見崔嵬
苦嗟霖雨遮藏久
深謝晴一作清風列
致來丹桂有時明
月滿
舊山無路白

猿哀禪僧指我真
空理心大茫然
一夜灰

遊青原山

所至紛紛簿領堆
也須風月洗塵埃
明朝相與尋師去

况是同行掉臂來

華陽洞

素虎斑虬躡紫煙
幾看滄海變桑田
赤城玉笥尋真後
又到華陽第八天

瀕陰亭

駕言晨出瀕臺隅
瀕上登臨酒拍壺
不似峴山羊叔子
心隨漢水欲吞吳

兩宋名賢小集卷一百六

欽定四庫全書

兩宋名賢小集卷一百七

宋陳思編

元陳世隆補

十州閣小集

王巨字伯通福州人淳熙間知南恩州

蔣家園

採蓮橋下路皂蓋拂雲來塵壓隨軒雨風生避暑臺酒

緣嘉客盡花為使君開共話西溪舊相忘此日杯

西湖

四明太守愛西湖想像桃源舊日圖不放塵埃生水面
為傳風月到皇都花開別嶼千機錦稻熟鄰田萬斛珠
聞說兒童騎竹馬至今昂首望通衢

和劉郡守十洲詩

太守劉戶部乘水涸時濬治陘塞因其餘力補葺廢
陘而湖上之景為之一新島嶼凡九作一成十隨景

命名遂有十洲之詠

花嶼

傳聞春入水邊枝
懊惱行人不暇持
任是杜陵歸較晚
也須排悶強裁詩

芳草洲

十步中間水四圍
不容紅紫亂相依
春風管取青青在
莫問愁人歸未歸

柳汀

不似長安陌上梢，只將離恨寄長條。
臨流繫得虹霓在，留作憧憧兩岸橋。

竹嶼

鳳集龍驤未是才，獨驚高節出雲來。
此君端的吾家舊，爭得柴門相向開。

煙嶼

離朱諦視也昏花，一足青鱣蓋白沙。
咫尺漁舟看不見，凡夫何處覓仙槎。

芙蓉洲

須信金行有智囊會將秋色賽春芳
清宵見白休相拒
多是潘郎鬢上霜

菊花洲

年年重九為人開不染春風一點埃
湖上蕭騷如粟里
虛樽還待白衣來

月島

夕陽盡處見滄洲一片清光水國秋
應是玉真梳洗罷

菱花臺上不曾收

雪汀

玉落風刀細細裁
梁王宮裏舊池臺
逍遙北地何人可
除是冰膚駕鶴來

松島

誰陪老碧到秋霜
賴有黃花隔水香
土淺波深難獨立
可能移植向公堂

十洲閣

山川如幻閣長秋一鳥飛來伴九洲不礙漁樵雙槳過
何妨羅綺四時游雲疑秦華分張去水憶蓬瀛散漫浮
禁苑未知湖海樂生綃寫取獻中州

兩宋名賢小集卷一百七